

Na osnovu člana 126. stav 2. tačka c), a u vezi sa članom 89. Zakona o visokom obrazovanju (Službene novine Kantona Sarajevo, br. 22/10), Senat visokoškolske ustanove Internacionalni Burč univerzitet - International Burch University, na XXXV sjednici, održanoj 25.03.2011. godine, usvojio je sljedeći

PRAVILNIK

o utvrđivanju bitnih elemenata ugovora o studiranju
na visokoškolskoj ustanovi Internacionalni Burč univerzitet - International Burch University

I. OPĆE ODREDBE

Član 1.

Ovim pravilnikom utvrđuju se bitni elementi ugovora o studiranju, koji se zaključuju sa studentima visokoškolske ustanove Internacionalni Burč univerzitet - International Burch University (u daljem tekstu Univerzitet), te druga pitanja od značaja za regulisanje međusobnih prava i obaveza između studenta i Univerziteta.

II. UGOVOR O STUDIRANJU

Član 2.

Status studenta Univerziteta stiče se upisom u odgovarajući semestar, odnosno godinu studijskog programa koji organizira Univerzitet u skladu sa Zakonom, odnosno Statutom Univerziteta. Prijem i upis u prvu studijsku godinu vrši se na osnovu konačnih rezultata javnog konkursa.

Član 3.

Studenti koji su primljeni i upisani na Univerzitet stupaju u ugovorni odnos s Univerzitetom. Ugovorom o studiranju uređuju se međusobna prava i obaveze između studenta i Univerziteta. Ugovor iz prethodnog stava se obavezno zaključuje na jeziku konstitutivnih naroda u BiH, a, ukoliko su ispunjeni uslovi za to, i na nekom od stranih jezika, na kojem se izvodi studij na Univerzitetu.

III. BITNI ELEMENTI UGOVORA

1. Obaveze Univerziteta

Član 4.

Univerzitet se obavezuje da Studentu obezbijedi sve potrebne uslove za izvođenje nastave, vježbi i konsultacija prema nastavnom planu i programu studija koji je student upisao, kao i da mu obezbijedi polaganje ispita u redovnim ispitnim rokovima i sticanje diplome, kao i druga prava u skladu sa Zakonom, Statutom i drugim aktima Univerziteta.

Član 5.

Univerzitet, odnosno osnivač Univerziteta, se obavezuje da će, u slučaju prestanka rada, obezbijediti sredstava u visini školarine za nastavak, odnosno završetak studija studenta. Univerzitet ima pravo da naplati školarinu od Studenta utvrđenu ovim ugovorom, i druga prava u skladu sa Zakonom, Statutom i drugim općim aktima Univerziteta.

2. Obaveze Studenta

Član 6.

Student je dužan da za obrazovne i druge intelektualne i edukativne usluge, odnosno usluge koje studentu pruža Univerzitet, odnosno njegove ovlaštene organizacione jedinice, izvrši plaćanje školarine u iznosu i prema uslovima utvrđenim odlukama nadležnih organa Univerziteta i ugovora o studiranju.

Član 7.

U slučaju promjene kursa KM u odnosu na EURO u toku studija, Univerzitet zadržava pravo da sve preostale obaveze studenta preračuna u EURO valutu prema srednjem kursu Centralne banke BiH koji je

bio važeći na dan sklapanja Ugovora o studiranju, a student se obavezuje da sve dalje uplate obaveza na ime školarine vrši u KM valuti primjenjujući srednji kurs Centralne Banke BiH za EURO na dan izvršene uplate.

Član 8.

Školarina ne uključuje troškove kupovine školskog pribora, kupovinu ili rentanje knjiga, kao ni troškove učešća u raznim kursevima i obukama za koje se dobijaju posebni certifikati, a koji nisu dio redovne nastave, niti troškove izleta i ekskurzija.

Školarina ne pokriva troškove smještaja, ishrane, prijevoza, kao ni ostale troškove koji ne ulaze u obaveze Univerziteta pobrojane u članu 4. ovog Pravilnika.

Član 9.

Student se obavezuje da prilikom upisa uplati školarinu u iznosu utvrđenom odlukama nadležnih organa Univerziteta i ugovora o studiranju, na žiro-račun Univerziteta.

Student ne može pohađati nastavu niti polagati ispite ukoliko nije uplatio školarinu.

Student ne može obnoviti godinu, niti upisati narednu, ukoliko nije izmirio obaveze iz prethodnog stava.

Član 10.

Ukoliko Student zaostaje sa uplatom školarine, Univerzitet može pismenim upozorenjem obavjestiti Studenta o obavezi izmirenja zaostalih obaveza.

Ukoliko Student i nakon upozorenja ne uplati zaostale rate, Univerzitet može jednostrano raskinuti ovaj ugovor.

U slučaju raskida ovog ugovora Univerzitet ima pravo da zadrži iznos do tada uplaćenih sredstava.

U svim slučajevima Student snosi troškove ispisa sa Univerziteta u visini od 5% od iznosa školarine.

Član 11.

Ukoliko rezultati Studenta u napredovanju nisu u skladu sa Pravilima studiranja, Student je dužan da participira u troškovima Univerziteta, potrebnim za nastavak njegovog školovanja (obnova godine i dr), u skladu sa odlukama nadležnih organa Univerziteta.

Student je dužan da prihvati izmjene u Studijskom programu, režimu studija i predmeta, donesene u skladu sa Zakonom, Statutom i drugim općim aktima Univerziteta.

IV. PRELAZNE I ZAVRŠNE ODREDBE

Član 12.

Pored bitnih elemenata, utvrđenih ovim Pravilnikom, Ugovorom o studiranju mogu biti regulisana i druga pitanja od značaja za studij, a kojim se detaljnije regulišu međusobna prava i obaveze studenta i Univerziteta.

Ugovor o studiranju, u smislu stava 1 ovog člana, pored bitnih elemenata, može sadržavati naročito: pitanja kojima se regulišu način i dinamika plaćanja, važenje ugovora, rješavanje sporova i druga pitanja.

Član 13.

Ovaj Pravilnik stupa na snagu danom davanja saglasnosti od strane Ministarstva obrazovanja i nauke Kantona Sarajevo i biće objavljen na oglasnoj ploči Univerziteta.

Broj: -11-IBU
Sarajevo, 25.03.2011.

PREDSJEDAVALA SENATA
Prof. dr. Hüseyin Padem

Dostaviti:
1x a/a
1x MONKS
1x Oglasna ploča